



Familierekorden heldt – så vidt:

Storfangst av Halvor Grindevoll Askvik

Det var så vidt ikkje rekorden i familien Grindevoll rauk søndag morgon. Halvor Grindevoll Askvik (12) og Jon Grindevoll fiska saman med meg i sone 2 natt til søndag.

Vi hadde fiska heile natta utan å kjenna anna enn småfisk då det i halv sjutida om morgonen small til på stanga til Halvor. Laksen fór nedover elva i ein "sinns svak" fart, med Halvor og meg etter. Jon "Blund", onkel til Halvor, låg i hytta og sov, så vi måtte klara oss utan hans hjelp.

50 meter nedafor der laksen tok såg det ut til å vera "game over". Snøret sat bom fast rundt ein stein. I fleire minuttar stod vi og diskuterte kva vi skulle gjera. Det var ikkje meir vatn enn at det lét seg gjera å vassa/symja over på andre sida, og det hadde nok blitt løysinga om ikkje

snøret hadde losna av seg sjølv. To gonger til var snøret fast rundt steinar, men losna greitt begge gongane. Av og til har ein den naudsynte flaksen.

Men problema var ikkje over. Fisken gjekk på "feil side" av holmen i sone 1. Nok ein gong låg det an til ein symjetur, men også denne gongen hadde vi flaks. Fisken kom sakte, men sikkert oppover i hølen og inn på vår side.

Resten var "a piece of cake", og etter 15-20 minuttar kunne vi endeleg håva laksen – i onkel Jon sin hæv.

Han ville ikkje tru oss – onkel Jon – då vi kom opp igjen i hytta og fortalte kva som hadde hendt medan han var i draumeland. Spørsmålet no var berre om familierekorden, som onkel Jon har hatt sidan 27. august 1978, var slått. Spaninga var stor – 7.1 kilo – 9 hekto for lite til å slå rekorden. Men neste gong ryk han!



Halvor Grindevoll Askvik har god grunn til å smila breitt. 7.1 kilo var laksen, årets nest største villaks i Oselvo. (Foto: Leif Juvik)

Fisket elles

Elles har fisket vore på

det jamne i Oselvo siste veke. Elva har hatt god vassføring lenge no, så

det er ikkje dei store "flaka" med fisk som kjem. I tillegg til mykje "Bolaks-

laks", er det villfisk frå 3-6 kilo som blir tatt, og litt sjøaure. Tert er det framleis lite av.

Også på Søfteland er det blitt tatt litt fisk. Heldigaste her er vel Terje Monssen som fekk to lakssar på floga same kvelden. Slå den!

Andre elvar

Trøndelagselvene ser ikkje ut til å vera i toppform i år. I dei fleste er det altfor lite vatn. Kjell A. Mikkelsen fiska sist veke i Verdalselva, utan fangst.

Betre gjekk det for dei som fiska i Finnmark sist veke. Ove Tumyr & co fiska i diverse Finnmarks-elvar i forrige veke med godt resultat. Fint med fisk frå 1 til 5 kilo, og fantastiske naturopplevingar. Litt lite vatn er det i mange av elvane her òg, men ikkje verre enn at fisket var bra i dei fleste. Så skal du på ein skikkelg fisketur, er Finnmark absolutt eit alternativ. Skitt fiske!